

Ultimo ora

Nisbet y Flanegien enbes di bishitá Gobernador lo bai Parlamento pa entregá nan retiro



ORANJESTAD - No mester excluí e posibilidad cu tanto Nisbet como Flanegien enbes di entregá nan carta di retiro awe mainta na Gobernador Koolman, manera primintí na Promé Minister Nel Oduber ayera mainta, cu nan lo preferá di haci esaki den Parlamento.

Parlamento como e órgano cu a eligi nan como minister. Si nos bai den pasado, anto Benny Nisbet lo no kier cometé mesun error di pasado, di entregá su retiro sin mas, mientras cu den e caso di Charro Kelly, el a haci esaki den Parlamento, unda el a habri afó contra di su coleganan minister.

Despues di tur acusacion di un que otro, Kelly a entregá su carta di retiro, evitando hasta un mocion di desconfianza.

Ademas te awor MEP, ni PPA ni ADN oficialmente no a informá Parlamento cu nan no tin confianza mas

den otro.

Segun participacion di Promé Minister Nel Oduber ayera mainta na Gobernador, cu Ministernan Benny Nisbet y Tinchí Flanegien lo entregá nan retiro awe mainta alrededor di 11.30. Y inmediatamente despues partidonan AVP y MEP lo iniciá negociacion pa formacion di un Gobierno nobo.

Pero manera mencioná, e dos ministernan, Nisbet y Flanegien, por cambia di opinion y bai Staten. Pasobra sigur nan lo kier laga pa record, nan "bon" trabao haci y motivá nan retiro, apesar cu nan a haci un "bon" trabao.

Pero al mismo tempo, nan lo por bai exigí públicamente den Parlamento, motibo di e terminacion di e cooperacion di Gabinete Oduber II, apesar di tur elogio duná dor di Promé Minister Oduber pa nan cooperacion pa por a logra varios proyecto.

Esaki sigur lo bira parti di e strategia político di cualkier

político hungá. Y ora papia di político hungá, nos no ta kere den un Tinchí Flanegien, pero Benny Nisbet si.

Negociacion corto

Awe mes por iniciá cu negociacion, si no tin nada particular y manera anticipá aki riba.

E negociacion aki, manera tanto Mr. Henny Eman como Nel Oduber a bisa, di lo no ta di un largo duracion. Aparentemente e "heridanan" a sera despues di un aña y algun luna.

Políticamente den seno di AVP, nan ta mira un eleccion mas factible, pero ora di papia di "interés di Aruba", anto mester demostrá madurez político, unda e dos partidonan mas grandi, esta AVP y MEP mester por haya otro pa "saca" Aruba di e abismo cu e ta den actualmente.

Ayera mainta tanto lider di MEP, Nel Oduber como lider di AVP, Mr. Henny Eman a ser invitá dor di Gobernador Koolman pa un encuentro separadamente unda a sondeá e posibilidadnan di un próximo Gobierno.

Promé Minister Nel Oduber a garantizá cu tanto Nisbet como Flanegien lo entregá nan retiro pa 11.30 awe mainta.

Oduber a bisa cu Gobierno no a cai, manera varios medio di prensa a relatá, pero a referi na e análisis di Bon Dia Aruba cu ta cuadra completamente cu e berdad.

"Nos tin un Gobierno cu tin sostén di 9 asiento, des-

pues cu a terminá relacion cu PPA y ADN, pero tin palabracion cu AVP cu nan lo aceptá cu ministernan di MEP lo keda mientras cu tin un reformacion. Legalmente nos tin un Gabinete minoritario pa un periodo masha limitá pa yega na un reformacion".

Segun Promé Minister Nel Oduber, e ta masha satisfecho di e reaccionnan cu e ta ricibí den pueblo y muy en especial di parti di e gremionan cual relacion no tabata di gaba. Y tur hende no ta kere den un eleccion aworaki, pero cu AVP y MEP mester pone interés general na promé lugar.

Mr. Henny Eman


Lider di AVP, Mr. Henny Eman a bishitá Gobernador Koolman tambe ayera mainta, unda el a keda como un ora largo. Segun Eman nan a repasá e situacion actual y a papia riba e palabracion cu tin for di Diadomingo mainta entre MEP y AVP. Cu e.o. ta

terminá confianza den e partidonan chiquito y despues di esey MEP por entregá nan retiro como Gobierno y ora esey tuma lugar lo sinta na mesa pa evaluá kico por bai haci pa futuro di e isla aki.

"Nos kier haya informacion di Gobernantenan di MEP pa evaluá kico e situacion financiero ta, con grandi e crisis ta y a base di e informacionnan ey mira con mester sigui cu e deliberacionnan.

E negociacion lo no ta largo, ta cuestion di oras. Nos a palabrá cu Gobernador cu AVP lo bai den un proceso rápido, maske for di dia 17 di November nos partido a dicidí caba cu nos ta preferá un eleccion nobo. Pero mirando e circunstancia actual, nos ta dispuesto di mira si por forma toch un Gobierno pa tras pasá e periodo difícil aki y pa despues papia di eleccion", segun Henny Eman.

Esaki ta e tópico di discusion, esta yega na formacion di un Gobierno transitorio. □



Solucion sin funcion

ORANJESTAD-Aña pasá gobierno a dicidí di busca un alivio pa e problema di e cholleran, kendenan tabata hospedá den e famoso cas di dos mion den Wilhelminastraat. Un suma di alrededor 20.000 florin a ser gastá pa sera e lugar cu basta plachi di zink pero ya algun luna despues e cholleran a bolbe penetrá den e cas aki, y ningun hende a kibra nan cabez.

Riba e foto por mira con e zinknan a cuminsa cai for di otro y ta forma un peligro inmenso pa tur hende cu ta pasa serca di nan. Un biento fuerte por hisa un di e plachinan aki benta di tal forma cu e por kap un hende den dos. Ta di spera cu esnan concerní por laga haci algo cu e situacion aki pa evitá un accidente lamentabel den futuro, sin gasta atrobe un dineral manera ya a haci caba. □

